



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 048598 24 Iž**  
**Sarajevo, 16.07.2024. godine**

*Sud Bosne i Hercegovine u Sarajevu, u vijeću apelacionog odijeljenja sastavljenom od sudija Dinke Bešlagić-Čovrk kao predsjednice vijeća, Vesne Trifunović i Mirsade Džindo kao članova vijeća, odlučujući o žalbi političke stranke „Možemo bolje“ sa sjedištem u Bihaću ul. Bosanskih kraljeva bb koju zastupa predsjednik stranke Željko Mirković izjavljenoj protiv odluke Centralne izborne komisije Bosne i Hercegovine broj: 05-01-07-5-729/24 od 09.07.2024. godine, o utvrđenoj odgovornosti za preuranjenu izbornu kampanju, na nejavnoj sjednici, održanoj dana, 16.07.2024. godine, donio je*

**RJEŠENJE**

*Žalba se odbija.*

**Obrazloženje**

*Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka „Možemo bolje“ odgovorna što je putem društvene mreže Facebook vodila preuranjenu izbornu kampanju pa joj na osnovu člana z člana 7.1, 16.14 stav 3, 6.7 stav 2 tačka 1 Izbornog zakona BiH i primjenom člana 19.9 stav 1. tačka 3) i stav 2. Izbornog zakona BiH izrečena novčana kazna u iznosu od 4.000,00 KM (slovima: četiri hiljade konvertibilnih maraka).*

*Političkoj stranci „Možemo bolje“ naloženo je da sa društvene mreže Facebook ukloni spornu objavu za koju je Centralna izborna komisija BiH izrekla novčanu kaznu, te da sve pristalice i kandidate ove političke stranke za predstojeće Lokalne izbore 2024. godine obavjesti da su dužni da se suzdrže od javnog oglašavanja i vođenja izborne kampanje u elektronskim, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.*

*Protiv ovog rješenja žalbu je blagovremeno podnijela politička stranka „Možemo bolje“ zbog pogrešno i nepotpuno utvrđenog činjeničnog stanja i pogrešne primjene materijalnog propisa. Ističu da CiK BiH nije dokazala da su vodili i oglašavali izbornu kampanju, upozoravali birače i javnost sa izbornim programom i kandidatima za predstojeće Lokalne izbore, budući da nisu isticali predizborne slogane, niti su u objavi spominjali predstojeće izbore. Za utvrđenje da su prekršene odredbe Pravilnika o medisjkom predstavljanju i javnom oglašavanju političkih subjekata u izbornom periodu, nije pružen ni jedan materijalni dokaz. Time je pogrešno utvrđeno da su vodili preuranjenu izbornu*

*kampanju u smislu člana 7.1 Izbornog zakona jer su predstavljali politički manifest koji nema obilježja izborne kampanje, niti je pomenuta aktivnost vezana za izbore jer predstavlja stranačku aktivnost i informacija članovima i simpatizerima. Ukazuju da su opredjeljeni na poštovanje Izbornog zakona i da CiK prilikom odlučivanja nije cijenio njihove aktivnosti na društvenim mrežama koje ovu činjenicu potvrđuju. Smatraju da je novčana kazna neopravdano visoko odmjerenjena i predlažu da se žalba usvoji, a pobijano rješenje poništi.*

*U odgovoru na žalbu, Centralna izborna komisija Bosne i Hercegovine predložila je da Sud žalbu odbije kao neosnovanu jer je pobijana odluka donesena na pravilan i potpun način na osnovu utvrđenja da objava na društvenoj mreži ima karakter, preuranjene i plaćene izborne kampanje za koje povrede je izrečena adekvatna sankcija.*

*Žalba nije osnovana.*

*Prema stanju u spisu proizlazi da je Centralna izborna komisija Bosne i Hercegovine dana 19.06.2024.godine zaprimila informaciju sa dokazima, da je politički subjekt „Možemo bolje“ provodio preuranjenu i plaćenu izbornu kampanju koju informaciju je podnio Transparency International BiH, te da je dana 25.06.2024. godine zaprimila anonimnu prijavu sa dokazima za istu radnju, koju postupci su spojeni i cijenjani kao inicijativa za pokretanje postupka po službenoj dužnosti.*

*Centralna izborna komisija BiH dostavila je inicijativu na izjašnjenje političkoj stranci „Možemo bolje“, te je nakon uvida u dostavljene dokaze-screenshot objave na društvenoj mreži Facebook i dato izjašnjenje, donijela osporenu odluku o utvrđenoj odgovornosti žalioca jer je putem društvene mreže Facebook vršio preuranjenu izbornu kampanju, čime je prekršio pravila ponašanja u izbornom periodu iz člana 7.1 Izbornog zakona BiH.*

*Cijeneći pravilnost i zakonitost pobijane odluke Centralne izborne komisije BiH, apelaciono vijeće je utvrdilo da je donesena nakon uvida u kompletan spis predmeta i da je na utvrđeno činjenično stanje pravilno primjenjeno materijalno pravo.*

*Prije svega u pobijanom rješenju cijanjena je odredba člana 1.1 a stav 1 tačka 8 Izbornog zakona (Sl. glasnik BiH br. 23/01 sa izmjenama) koja propisuje da preuranjena kampanja predstavlja svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Tačka 7 citiranog člana propisuje da period izborne kampanje počinje 30 dana prije otvaranja biračkih mjesta i završava 24 sata prije otvaranja biračkih mjesta, tokom kojeg perioda subjekti na zakonom utvrđen način upoznaju birače sa i javnost sa programima i kandidatima za predstojeće izbore. Time je nesumnjivo da svaka promocija političke partije prije zakonom propisanog perioda je preuranjena kampanja, pa tako i predmetna objava na društvenoj mreži Facebook, pod uslovom da sadržaj objave ima karakter izborne kampanje.*

*Citirana odredba pod izbornom kampanjom podrazumjeva upoznavanje birača i javnosti ne samo sa kandidatima, nego i sa programom. Predmetna objava žalitelja na društvenoj mreži Facebook predstavlja upravo promociju političke stranke poredeći se sa aktuelnim političarima, sadrži jasnu političku poruku sa pozivom biračima za pristupanje*

*stranci. Dakle, i prema zaključku apelacionog vijeća, tekst objave ima sve karakteristike izborne kampanje. Bez obzira što objava ne promovira kandidate, ne može se prihvatiti žalbeni navod da nema karakter kampanje i da predstavlja informaciju o političkoj platformi, jer cjelokupni tekst objave nesumnjivo sadrži zakonom propisane elemente izborne kampanje.*

*Time je Centralna izborna komisija BiH pravilno ocijenila da oglašavanje na društvenoj mreži koje je objavila politička stranka „Možemo bolje“ kako u pogledu sadržaja objave, tako i u pogledu načina i vremena objavljivanja, ima elemente preuranjene izborne kampanje, čime su povrijeđene odredbe člana 7.1 Izbornog zakona BiH i člana 9 stav 1 Pravilnika o medijskom predstavljanju i javnom oglašavanju političkih subjekata u izbornom periodu (Sl. glasnik BiH br. 32/24). Kako se radi o plaćenju izbornoj kampanji prekršene su i odredbe člana 16.14 stav 3 Izbornog zakona.*

*Pravilnom primjenom člana 19.9 stav 1 tačka 3 i 23 Izbornog zakona BiH, žalitelju je izrečena novčana kazna u iznosu od 4.000,00 KM za koju su dati razlozi navođenjem otežavajućih i olakšavajućih okolnosti. Kada se cijeni da je navedenom odredbom propisan raspon novčane kazne od 3.000,00 KM do 30.000,00 KM, izricanje kazne u neznatno većem iznosu od zakonskog minimuma je adekvatno za ukazane dvije povrede, pa žalba neosnovano pobija i odluka o visini novčane kazne.*

*Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Službeni glasnik BiH, broj 19/02 -74/10), valjalo odbiti.*

**PREDSJEDNICA VIJEĆA  
S U D I J A  
Dinka Bešlagić-Čovrk**